



ЎЗБЕКИСТОН ПРЕЗИДЕНТИ ҚИРҒИЗИСТОНГА КЕЛДИ

Ўзбекистон Республикаси Президенти Шавкат Мирзиёев Қирғиз Республикаси Президенти Садир Жапаровнинг таклифига биноан 20 июль куни Чўлпонота шаҳрига келди.

Аэропортда давлатимиз раҳбарини Қирғиз Республикаси Вазирлар Маҳкамаси Раиси — Президент Администрацияси Раҳбари Акилбек Жапаров ва бошқа расмий шахслар кутиб олди.

Марказий Осиё давлатлари раҳбарларининг саммити олдидан Ўзбекистон Президенти Шавкат Мирзиёев, Қозоғистон Президенти Қосим-Жомарт Тоқаев ва Қирғизистон Президенти Садир Жапаровнинг норасмий учрашуви бўлиб ўтди.

Давлат раҳбарлари биргаликда “Номад” маданият марказига бордилар. Хунармандчилик буюмлари кўргазмаси кўздан кечирилди. Сўнг кўчманчилар ўйинлари намойиш этилди.

Марказий Осиё халқлари куй-қўшиқларидан тузилган концерт дастурида элларимиз бирлиги, маданий яқинлиги намойён бўлди.

Аввал хабар қилинганидек, 21 июль куни Чўлпонотада Марказий Осиё давлатлари раҳбарларининг Маслаҳат учрашуви бўлиб ўтади. Саммитда савдо, транспорт ва логистика, саноат кооперацияси, инновациялар,

озиқ-овқат хавфсизлиги, туризм, маданий-гуманитар соҳалардаги амалий ҳамкорликни янада кенгайтириш масалалари муҳокама қилинади. Шунингдек, минтақада барқарорлик ва изчил тараққиётни таъминлаш масалалари юзасидан фикр алмашилади.

Қатор ҳужжатлар имзоланиши кўзда тутилган.

Таъкидлаш лозимки, Марказий Осиё давлатлари раҳбарларининг Маслаҳат учрашувларини ўтказиш ташаббуси Ўзбекистон Республикаси Президенти Шавкат Мирзиёев томонидан 2017 йилда Бирлашган Миллатлар Ташкилоти Бош ассамблеясининг 72-сессиясида илгари сурилган эди.

Минтақа етакчиларининг биринчи саммити 2018 йил март ойида Нур-Султон шаҳрида, иккинчиси 2019 йил ноябрда Тошкент шаҳрида, учинчиси ўтган йилнинг август ойида Туркманистондаги “Аваза” миллий сайёҳлик зонасида бўлиб ўтган.

ЎЗА

Ўзбекистон Республикаси Президентининг ФАРМОНИ

ҚОРАҚАЛПОҒИСТОН РЕСПУБЛИКАСИ ХУДУДИДА ФАВҚУЛОДДА ҲОЛАТНИНГ АМАЛ ҚИЛИШINI ТУГАТИШ ТЎҒРИСИДА

Қорақалпоғистон Республикаси Жўқорғи Кенгесининг фавқулодда ҳолатнинг амал қилишини муддатидан аввал тугатиш тўғрисидаги мурожаатини ҳамда Қорақалпоғистон Республикаси ҳудудида жамоат тартиби тикланганлигини ва кўрилган чоралар натижасида фуқароларнинг хавфсизлиги, уларнинг ҳуқуқ ва эркинликлари ҳимояси таъминланганлигини инобатга олиб, шунингдек, Ўзбекистон Республикасининг “Фавқулодда ҳолат тўғрисида”ги Конституциявий қонунининг 11-моддасига мувофиқ:

1. Ўзбекистон Республикаси Президентининг 2022 йил 2 июлдаги “Қорақалпоғистон Республикаси ҳудудида фавқулодда ҳолат жорий этиш тўғрисида”ги ПФ-164-сон Фармони

билан Қорақалпоғистон Республикаси ҳудудида жорий этилган фавқулодда ҳолатнинг амал қилиши 2022 йил 21 июль куни соат 05:00 дан бошлаб муддатидан аввал тугатилсин.

2. Мазкур Фармон 2022 йил 21 июль куни соат 05:00 дан эътиборан қучга қиради ва оммавий ахборот воситаларида дарҳол эълон қилиниши шарт.

3. Мазкур Фармоннинг Олий Мажлиси палаталарига тасдиқлаш учун юборилсин.

4. Мазкур Фармоннинг ижросини назорат қилиш Ўзбекистон Республикасининг Бош вазири А.Н.Арипов ва Ўзбекистон Республикаси Президенти ҳузурдаги Хавфсизлик кенгаши котиби В.В.Махмудов зиммасига юклансин.

Ўзбекистон Республикаси Президенти

Тошкент шаҳри,
2022 йил 20 июль

Ш. МИРЗИЁЕВ

Ўзбекистон Республикаси Олий Мажлиси Қонунчилик палатаси ва Сенатининг ҚЎШМА ҚАРОРИ

ЎЗБЕКИСТОН РЕСПУБЛИКАСИ ПРЕЗИДЕНТИНИНГ “ҚОРАҚАЛПОҒИСТОН РЕСПУБЛИКАСИ ХУДУДИДА ФАВҚУЛОДДА ҲОЛАТНИНГ АМАЛ ҚИЛИШINI ТУГАТИШ ТЎҒРИСИДА”ГИ ФАРМОНИНИ ТАСДИҚЛАШ ҲАҚИДА

Ўзбекистон Республикаси Конституцияси 78-моддаси биринчи қисмининг 19-бандига ва “Фавқулодда ҳолат тўғрисида”ги Ўзбекистон Республикаси Конституциявий қонуни 11-моддасининг иккинчи қисмига мувофиқ Ўзбекистон Республикаси Олий Мажлисининг Қонунчилик палатаси ва Сенати ҚАРОР ҚИЛАДИЛАР:

1. Ўзбекистон Республикаси Президентининг 2022 йил 20 июлдаги “Қорақалпоғистон Республикаси ҳудудида фавқулодда ҳолатнинг амал қилишини тугатиш тўғрисида”ги ПФ-173-сонли Фармони тасдиқлансин.

2. Ушбу Қўшма қарор дарҳол Ўзбекистон Республикаси Президентига юборилсин.

3. Ушбу Қўшма қарор қабул қилинган кундан эътиборан қучга қиради.

Ўзбекистон Республикаси Олий Мажлиси Қонунчилик палатасининг Спикери Н. ИСМОИЛОВ

Ўзбекистон Республикаси Олий Мажлиси Сенатининг Раиси Т. НОРБОЕВА

Тошкент шаҳри,
2022 йил 20 июль

ХАЛҚАРО ҲАМКОРЛИК

ИЛМ-ФАН ВА БИЗНЕС ҲАМКОРЛИГИДАГИ “ОЛТИН КЎПРИК”



Ўзбекистон ва Эрон иқтисодий ўзаро манфаатли тарзда бир-бирини тўлдириб, биотехнология, тўқимачилик, электротехника, кимё, фармацевтика, қурилиш материаллари ишлаб чиқариш каби соҳаларда ҳамкорлик қўламини йилдан-йилга кенгайтириб бормоқда.

Таъкидлаш жоизки, амалга оширилган йирик лойиҳалар натижасида сўнгги 5 йилда Ўзбекистонда Эрон капитали иштирокидаги корхоналар сони 4 баробар кўпайди. Икки томонлама мулоқот ва ўзаро алмашувларнинг фаоллашуви кузатилиб, савдо кўрсаткичлари ва кооперация лойиҳалари сони ҳам ортиб бормоқда. Рақамларга эътибор қаратсак, ўтган йили товар айирбошлаш 73 фоизга, жорий йил бошидан эса яна 22 фоизга ошди.

Шу йил 19 июль куни Президентимиз мамлакатимизда амалий ташриф билан бўлган Эрон Ислом Республикаси Президентининг илм-фан ва технологиялар бўйича вице-президенти Сорена Сатторийни қабул қилди.

▶ Давоми 2-бетда

ТАРАҚҚИЁТ МЕЗОНЛАРИ

“МАЛЛАБОЙ ТАЖРИБАСИ” БЕКОБОД ТУМАНИДА ТОМОРҚАДАН САМАРАЛИ ФОЙДАЛАНИШ БУГУН АНА ШУНДАЙ АТАЛМОҚДА



Президентимиз Шавкат Мирзиёев раислигида шу йил 18 июль куни озиқ-овқат маҳсулотлари етиштириш ва аҳоли даромадларини кўпайтириш масалалари бўйича ўтказилган видеоселектор йиғилишида ҳозир 64 та туман аҳолиси томорқадан 3 марта ҳосил олиб, битта оила ўртача 60-100 миллион сўмгача даромад қилаётгани, лекин 22 та туманда томорқадан фойдаланиш самарадорлиги пастлиги таъкидланди.

Давлатимиз раҳбари бу борада Бекобод тумани Маллабой маҳалласидаги хонадонлар томорқадан унумли фойдаланиб, эришадиган натижалар, ҳоким ёрдамчиси йўлга қўйган ижобий тажрибани алоҳида намуна қилиб кўрсатди.

Маллабойдан қолган “мерос”

Маллабой маҳалласи муваффақияти сири нимада экани, бундай натижаларга қандай эришилган билан яқиндан танишиш мақсадида Бекобод туманига йўл олди.

▶ Давоми 3-бетда

БАНДЛИК

“ҲОКИМ ВА ЁШЛАР” МУЛОҚОТИ БИТИРУВЧИЛАРНИ ИШ БИЛАН ТАЪМИНЛАШДА МУҲИМ ОМИЛ БЎЛМОҚДА

Олий ўқув юртини тамомлаган талабанин олдидан асосий мақсад — муносиб шароит ва яхши даромадга эга иш топиш туради. Тўрт йил давомида эгаллаган билимини амалиётда қўллаш орқали жамият ривожига ҳисса қўшиш учун ҳам ёшлар ўз мутахассислиги бўйича муносиб ишга жойлашишга интилади. Аммо ҳар йили меҳнат бозорига юз минглаб йигит-қиз кириб келишини инобатга олсак, танловда қандай рақобат бўлишини тасаввур қилиш қийин эмас.



▶ Давоми 5-бетда

КОРРУПЦИЯСИЗ КЕЛАЖАК САРИ

БОЖХОНА, СОЛИҚ, БАНДЛИК ВА МЕҲНАТ МУНОСАБАТЛАРИ

СОҲАЛАРИНИНГ КОРРУПЦИЯГА ҚАРШИ КУРАШИШ БЎЙИЧА ФАОЛИЯТИ ЯХШИ ДЕБ ТОПИЛДИ. БУ НАТИЖАГА ҚАНДАЙ ЭРИШИЛДИ?

Давлатимиз раҳбари Президент лавозимига киришиш тантанали маросимида “Жамиятимизда коррупция, турли жиноятлар содир этиш ва бошқа ҳуқуқбузарлик ҳолатларига қарши курашиш, уларга йўл қўймайлик, жиноятга жазо албатта муқаррар экани тўғрисидаги қонун талабларини амалда таъминлаш бўйича қатъий чоралар кўришимиз зарур”, дея таъкидлаган эди.

▶ Давоми 3-бетда

